

JEFFRY TCHONG

Naci (2-1-1972)

DESDE UKRAINE

KEN

Mi a nace na Aruba y a keda mi pais te ora cu mi a caba mi VWO na Colegio Arubano y a bay Hulanda pa sigui studia. Despues cu mi a gradua na Universidad di Amsterdam den Politologie mi a bai traha pa Ministerio di Asuntonan Exterior na Hulanda. Semper mi a gusta a tema di politica internacional y e "misterio" rond di embahadanan. Despues di a traha tres aña na Hulanda mi a haya un traslado pa e embahada di Hapon. Despues di un temporada di 3 aña na Hapon mi a sigui pa Ukraine. Mi ta biba na Kiev cu ta e capital di Ukraine.

(F: Ukraine a haya su independencia for di Rusia na 1991 y ta un pais cu ta geograficamente mas grandi cu Francia y tin mas cu 46 miyon habitante).

TRABOU

Como prome secretario di e embahada mi ta sigui desaroyonan politico. Tambe mi ta maneha proyectonan di desaroyo pa Ukraine y Moldavia cu ta e pais bisiña di Ukraine. Mi a siña e idioma oficial cu ta un idioma Ruso mescos cu mi mester a siña Hapones ora mi a biba na Hapon. Na embahada na Kiev, 35 personan ta traha di locual 15 tin e nacionalidad Hulandes. Nos tin un cultura na e embahada unda tin un interes amplio riba tur sorto di topiconan. No tin un cultura di "ken ta gana mas placa y ken a haya e bonus mas halto". E hendenan ta ambicioso si pa locual ta nan carera y con halto nan por subi den e hirarchia di e embahada. Mescos cu den companianan priva, tin un hirarchia cu e funcionnan mas halto. Funcionnan halto den e ministerio di asuntonan exterior y especificamente den e embahadanan ta e posicion di embahador nan cuidadnan manera Paris, London, Berlin, Brussels y Washington.

PROYECTONAN DI DESAROYO

Den mi trabou mi ta hopi involvi den financiamiento di proyectonan pa desaraya e sociedad di e paisnan aki. Den pasado e partido comunista a negligia hopi desaroyonan. E meta di nos programa ta pa transforma e sociedad di e sistema comunista y dictatorial pa uno cu ta democratico y diversifica cu participa-

cion activo di su ciudadanonan. Nos budget pa e programa ta EUR 7 miyon pa e dos paisnan aki.

UN CULTURA DIFERENTE

Ukraine tin un cultura Europeo hopi bieu relata na e religion cristian-ortodoxo cu masha hopi historia y por ehempel, misanan di antes. E hendenan ta hopi conciente di nan pasado: e religion, e arkitektura, e escritornan, e poetanan y e compositornan di musica clasico. Di otro banda, e hendenan ta mas cera y ta hari menos lihe. E hendenan ta hopi diferente compara cu na Aruba, nan a bira mas duro dor di e historia cu nan a pasa den. Nos no tin cu lubida tambe tur e cambionan politico y economico desde cu Ukraine a bira independiente for di Rusia na 1991. Mi ta contento cu mi por experencia tur e diferente culturanan desde cu mi cuminsa traha na e ministerio. Locual tambe ta influencia e hendenan akinan ta e tempo cu por ta sumamente friu den winter (25 grado celcius bou cero). Compara cu Aruba e pais aki tin hopi elementonan di un pais di tercer mundo cu diferencia grandi entre hendenan rico y hendenan pover cu tin cu biba di un pensioen chikito. Aruba pa e banda ey ta un pais rico. Ukraine ta politicamente menos stabil si bo compara esaki cu Aruba. Actualmente tin un lucha politico entre diferente partidonan pa wak ken tin e poder real.

ARUBA

Mi ta sigui e desaroyonan na Aruba via mi famia y conocirnan. Mi a nace y lanta na Aruba y semper mi lo keda interesa den Aruba. Cu mi trabao actual mi no tin ambicion di bolbe Aruba, ya cu na e momentonan aki mi interes ta den otro paisnan. Tur aña si, mi ta bin Aruba pa vacacion. Manera cu tur hende sa, Aruba a desaroya su mes masha hopi den e ultimo decada, pero locual mi ta tende ta cu hopi hende ta preocupa cu e costo di bida na Aruba ta subi. Pa a banda ey mi ta sinti hopi malcontento. Pero di otro banda si nos wak e posicion di Aruba den Caribe e hecho ta cu na Aruba tin un prosperidad halto. E "challenge" pa Aruba ta pa mantene e posicion aki. Aruba - como parti di Reino - sigur ta haya su atencion den e ministerio di asuntonan exterior, specialmente na e embahadanan na Caracas y Washington. Nos tin cu tene cuenta si cu e importancia di Aruba den e totalidad di e ministerio di asuntonan exterior ta limita; Aruba ta keda un pais chikito. ■